



CH-7144 Vella, 09/02/2018

Novitads dalla suprastonza communal

Reparatura via d'uaul Seglias a Camuns

La via d'uaul Seglias a Camuns sto vegnir reparada pervia d'ina bova. Quei succeda enteifer il project collectiv ovras da protecziun 2018. Ils cuosts per la reparatura dalla via ein risguardai el preventiv communal 2018 e vegnan subvenziunai dalla Confederaziun ed il cantun Grischun cun 72%. Il rest surpren la vischnaunca sco proprietaria da baghegiar.

L'incarica da lavur per la reparatura dalla via d'uaul Seglias a Camuns ei vegnida surdada alla fatschenta Ribbert AG per la summa netta da CHF 45'280.45.

Integraziun dalla giuventetgna en fatgs politics

Per simplificar alla giuventetgna igl access a votaziuns ed elecziuns ha la suprastonza communal decidu da separticipar al program easyvote ed ha concediu il credit necessari da CHF 6.45 per persuna ed onn.

Uorden da parcar a Vella

Ils 15 da december 2017 ei vegniu introduciu in uorden da parcar el vischinadi da Vella ed ils parcadis publics ein vegni signalisai. Las restricziuns da parcar han vigur legala e surpassaments vegnan puni tenor la procedura da multa disciplinara.

L'incarica da far las controllas ei vegnida surdada alla firma Sprecher Security GmbH, Bonaduz.

Tualetta publica Vrin

La radunonza communal da Vrin ha concediu igl onn 2012 in credit da CHF 100'000 per baghegiar tualettas publicas ed ha surdau la realisaziun alla vischnaunca Lumnezia sco pendenza. La suprastonza communal Lumnezia ha decidu d'approbar il quen final per la tualetta publica a Vrin cun cuosts da CHF 75'514.00. La mesadad dalla summa, pia CHF 37'757.00, vegnan finanziaj cun mieds turistics incassai cun las taxas da hosps tenor la lescha turistica Lumnezia.

Renovaziun dalla pagina d'internet dalla vischnaunca da Lumnezia

La pagina d'internet dalla vischnaunca da Lumnezia ei en funcziun dapi che la fusiun da vischnauncas ei ida en vigur igl onn 2013. La versiun actuala vegn sustenida mo aunc cuort temps, aschia ch'igl ei necessari da far in'actualisaziun dalla pagina d'internet www.lumnezia.ch.

Actualmein metta la firma 2sic internet solutions GmbH a disposiziun il sistem da reservaziun per las reservaziuns da localitads dalla vischnaunca Lumnezia. Quei sistem ei integraus ella pagina actuala dalla vischnaunca, ei denton aunc buca accessibels en fuorma mobila. Per quei motiv ha la firma VIADUCT, Somedia Production AG proponiu da midar il sistem da reservaziun sin planyo.com ch'ei accessibels en fuorma mobila.

La suprastonza communal ha decidu da surdar l'incarica da renovar la pagina d'internet dalla vischnaunca da Lumnezia alla firma VIADUCT, Somedia Production AG, Cuera, cumpriu il sistem da reservaziuns, per ina pauschala da CHF 24'000 inclusiv taglia sin valeta augmentada TVA da 7.7 % (naven 01-01-2018).

El preventiv da quen communal pigl onn 2018 ei cuntenida ina summa da CHF 24'000 per l'actualisaziun dalla pagina d'internet. Ils cuosts che serepetan mintg'onn (CHF 660) ein medemamien risguardai leu.

Sanaziun stabiliment da tir Rofna

Suenter 31 onns vegn il tir cantunal dil Grischun puspei menaus atras en Surselva. Igl onn 2018 ha liug il 25avel tir cantunal sut il num "Tir cantunal Grischun Surselva". Center dalla fiasta ei Rueun, nua che la controlla dallas armas vegn fatga. Leu sesanfla era il center da datas. L'uniun da tir Rofna metta a disposiziun igl implont da tir per quei eveniment, quei sper 13 auters stans da sittar che sesanflan a Sedrun, Mustér, Sumvitg, Pardiala, Sursaissa, Surcuolm, Flond, Laax, Flem, Versomi, Riein, Duvin e Val.

Tenor lescha federala ston tut ils stabiliments da tir esser equipai naven digl 1. da schaner 2021 cun systems da pegliaballas artificials. Igl Uffeci digl ambient dil cantun Grischun veva perquei recumandau da sanar el medem mument il terren entuorn ils pegliaballas.

La vischnaunca Lumnezia ei separticipada vid ils cuosts per la sanaziun dil stabiliment da tir Rofna cun la summa da CHF 71'797.95.

Il rendaquen che pertucca la sanaziun dil terren contaminau entuorn il stan da schibas ei aunc buca verificaus.

Sustegns finansials

La suprastonza communal ha decidiu da sustener ils suandonts projects cun ina contribuziun finanziaria:

- Societad da musica Suraua cun CHF 2'500.00 sco contribuziun per la cumpra dad instruments e per la fiasta da giubileum da 40 onns.
- L'organisaziun internaziunala per usonzas dils Gualsers pil project Grosser Walsertweg cun la summa da CHF 2'000.
- L'organisaziun Ilanzer Märchenstadt cun CHF 300.00 pil program da Nadal per affons 2017.
- Igl archiv cultural cun ina contribuziun da CHF 10'000, cun la proposta d'endrizzar igl archiv ed il biro el center communal a Degen.
- La transformaziun dil curtgin dalla cuort e la renovaziun dalla Cuort Ligia Grischa a Trun cun ina contribuziun unica da CHF 4'226.75 tenor la proposta dalla conferenza dils presidents dalla Regiun Surselva.
- La sanaziun dil museum regional Surselva a Glion cun ina contribuziun unica da CHF 8'453.50 che tucca alla vischnaunca da Lumnezia tenor la clav da repartiziun usitada per la contribuziun da vischnaucas en Surselva da CHF 100'000, secund la proposta dalla conferenza dils presidents dalla Regiun Surselva.
- La reediziun dil cudisch Davos ils mugrins dall'autura Lumneziana Leontina Lergier-Caviezel cun CHF 1'000.00.

Plan da master entuorn il Mundaun

Suenter che la vischnaunca da Ilanz/Glion ha refusau la participaziun ad ina societad d'infrastructura comunabla ha la suprastonza communal decidiu da cuntinuar la collaboraziun cun la vischnaunca Sursaissa Mundaun e las pendicularas Sursaissa Mundaun. Ina proposta pil niev concept vegn presentaus alla populaziun a caschun dalla proxima radunonza communal.

Conclus dalla radunonza communal Lumnezia dils 15 da december 2017

La radunonza communal Lumnezia dils 15 da december 2017 ha

- approbau il preventiv dil quen economic cun cuosts da CHF 15'254'980 ed in recav da CHF 15'382'400, che siara cun in surpli da recav da CHF 127'420.
- approbau il preventiv dil quen d'investiziun cun expensas da CHF 8'295'000 ed entradas da CHF 1'440'150.00.
- decidiu unanimamein da schar il pei da taglia communal per entrada e facultad tuttina sco igl onn 2017. Per igl onn 2018 vala in pei da taglia da 105 % dalla taglia cantunala semplia sin entrada e facultad.
- concediu il credit da baghegiar da CHF 1'700'000 per il project provediment d'aua per ils uclauns da Lumbrein (Nussaus, S.Andriu, Surin, Pruastg Dadens, Pruastg Dado, Silgin).
- concediu in credit da CHF 400'000 per il project da parcadis publics el quartier Bual a Vella.

- concediu il dretg da baghegiar el quartier Bual a Vella a Daniel Camenisch e Rahel Lombris.
- deliberau la lescha per il manteniment dallas ovras da meglieraziun per la vischnaunca Lumnezia per mauns dalla votaziun all'urna, che ha liug ils 04 da mars 2018.